

## Selekane sa Kamehla le Mehla



---

### SABATHA MANTSIBOEA

#### **Bakeng sa Boithuto ba Beke Ena Bala:**

Exod. 3:14; Gen. 17:1–6; Gen. 41:45; Dan. 1:7; Gen. 15:7–18; Gen. 17:1–14; Tšen. 14:6, 7.

#### **Teman'a Khopolo:**

“Ke [Molimo] tla tiisa selekane sa ka, se mahareng a ka le uena [Abrahama], le litloholo tsa hau tse u hlahlamang ka meloko ea tsona, e be selekane se sa feleng, ke be Molimo oa hao le oa leloko la hao le u hlahlamang” (*Genese 17:7*).

**K**e ba bakae ba hopolang ka ho hlaka bongoaeng ba rona bokulo kapa ho angoa ke serame sa matšoafu se ileng sa re kulisa haholo, ka khonahalo ea bobu bo fetang? Bosiung bo bolelele ba feberu, e be re phaphama borokong bo sa tebang ho fumana 'm'e kapa ntate oa rona a lutse setulong pela bethe ea rona ka leseli le fokolang la bosiu. Ke mokhoa o joalo, papisong, le moelelo oa botho, Molimo o ile a lula lehlakoreng la bethe ea lefatše le kulang ke sebe ha lefifi la boitšoarole qalella ho ntšofala mengoaha-kholong ea kamor'a Moroallo. Ka lebaka lena, o ile a bitsa Abrame 'me a rera ho thea ka mohlanka oa Hae ea tšepelang sechaba seo a tla se tšepela tsebo ea Hae 'me se fane ka pholoho. Ha ho le joalo, Molimo oa kena seleaneng le Abrame le litloholo tsa hae se thathiselletsang ka tsela e pharalletseng morero o halalelang oa ho pholosa motho litholoaneng tsa sebe. Morena o ne a sa tlo siea lefatše la Hae le sa lisoa, e seng le le bohloking bo boholo ha kana. Beke ena re tla talima ho phutholloha ha litšepiso tse ling hape tsa selekane.

**Beke ka Bokhutšoanyane:** Lebitso la Molimo ke mang? Bohlokoa ba mabitso ao Molimo o a sebelisitseng ho itsebahatsa ho Abrame ke bo fe? O ile a sebelisa mabitso a fe ho itsebisa? Hobaneng ha Molimo o ile oa fetola lebitso la Abrame ho ba Abrahama? Hobaneng ha mabitso a le bohlokoa? Ke lipehelo li fe, kapa maikarabello, a neng a hokahane le selekane?

*\*Ithute thuto ea beke ena ho lokisetsa Sabatha sa la 24 'Mesa.*

## Jehova le Selekane sa Abrahamama

“A ntoo re ho eena: Ke ‘na Jehova ea u ntšitseng Ure oa Kalde, ke tle ke u fe lefatše lena, e be lefa la hao” (Gen. 15:7). Mabitso ka nako e ‘ngoe e ka re mantšoa a boitsebahatso. A qetella ka kelellong tsa rona a amana le limelo tse itseng hoo hang ha re utloa lebitso re phakisa re hopola mekhoha eo. Ho tla mekhoha e fe kelellong, mohlala, ha u nahana ka mabitso aa: Albert Einstein, Martin Luther King Jr., Gandhi, kapa Dorcas? Lebitso ka leng le amahanngoa le limelo tse itseng le mehopollo.

Nakong ea Bibe, batho ba Bochabela bo haufi ba ne ba nka mabitso a le bohlokoa. “Kamehla ba-Heberu ba ne ba nahana lebitso le bontša limelo tsa motho ea reuoang, kapa mehopollo le boikutlo ba ea reang, kapa maemo a neng a tsamaellana le nako eo lebitso le neng le fanoa.”—*The SDA Bible Commentary*, pok. 1, leq. 523.

Ha Molimo o ne o qala ho kena seleaneng le Abrame, o itsebahalitse ho mopatriareka ka lebitso YHWH (le ngoloang e le MORENA, ka lithaku tse kholo phetolelong ea Morena James [Gen. 15:7] ‘me le bitsoa Jehova - Yahweh). Ka mokhoa o joalo, Genese 15:7 hantle e baleha tjena, “Ke ‘na YHWH ea u ntšitseng . . .”

Lebitso YHWH, leha le hlaha makhetlo a 6,828 Testamenteng ea Khale, le siretse kahar’a sephiri ka tsela e itseng. Le bonahala e le sebopoho sa leetsi hayah, ‘ho ba,’ e leng moo le ka bolelang, “Rabosafeleng,” “Ea Leng Teng,” “Ea Bileng Teng ka Boena,” “Ea Ikhonang,” kapa “Ea Phelang Kamehla le Mehla.” Libopoho tse halalelang tse bonahalang li thathiselletsoa ke boemo bona ke tsa ho ba teng ka Boena le botšepahi. Li supa Morena e le Molimo o phelang, Mohloli oa bophelo, ka ho fapana le melingoana ea bahedene, e neng e se teng kathoko ho mehopollo ea barapeli ba eona.

Molimo ka sebele sa Hae o hlalosa se boleloang ke Yahweh ho Exoda 3:14—“Ke ‘na Ealeng-teng.” Moelelo ona o hlalosa bonnete ba boteng ba Molimo bo se nang lipheho, ha hape o supa ho bua ha Hae holim’a bokhale, bojoale, le bokamoso.

Jehova hape ke lebitso la Molimo ka sebele sa Hae. Boitsebiso ba Jehova e le ea ntšitseng Abrame Ure e bua ka phatlatatso ea selekane sa Molimo le eena ho Genese 12:1–3. Molimo o batla Abrame a tsebe lebitso la Hae, hobane lebitso leo le senola litšobotsi tsa seo a leng sona, sebopoho sa Hae ka sebele, le semelo—‘me ho tsoa tse bong ena re ka ithuta ho tšepa litšepiso tsa Hae (Lipes. 9:10, Lipes. 91:14).

**Ha u nahana kapa u utloa lentsoe Jehova, ke makhabane kapa limelo li fe tse tlang kelellong? Ke tsa lerato, mohau, le tlhokomelo kapa tsa tšabo, bothata, khalemo? Ke mehopollo e fe e itlelang kelellong ha u nahana ka lebitso Jesu?**

## 'El Shaddai

“Eitse ha Abrame e se e le motho ea lilemo li mashome a robileng mono o le mong a metso e robileng mono o le mong, Jehova a iponahatsa ho Abrame, a re ho eena: Ke 'na Molimo o matla 'ohle. Tsamaea pel'a ka, u be khabane” (Gen. 17:1). Jehova o ne a ile a iponahatsa ho Abrahamama makhetlo a mangata pele (Gen. 12:1, 7; Gen. 13:14; Gen. 15:1, 7, 18). Joale, temaneng e kaholimo, Jehova o iponahatsa ho Abrahamama hape (“Jehova a iponahatsa ho Abrame”), a iponahatsa e le “Molimo o matla 'ohle”—lebitso le sebelisitsoeng bukeng ea Genese feela le bukeng ea Jobo. Lebitso “Molimo o matla 'ohle” le phuthetse 'El, lebitso la mantlha la Molimo le neng le sebelisoa har'a batho ba Bochabela. Leha moelelo o oo ehlileng e leng oa Shaddai o sa qaqa, phetolelo ea “Matla 'ohle” e bonahala e le eona e nepileng ka ho fetisisa. (Bapisa Esa. 13:6 le Joele 1:15.) Taba ea bohlokoa tšebelisoeng ea lebitso lena e bonahala e le ho fapanya boholo le matla a Molimo le ho fokola le ho tetema ha botho.

**Bala Genese 17:1–6, e thusang ho beha ntho e 'ngoe le e 'ngoe moeelong o pharalletseng ka ho fetisa. Hobaneng ha Morena nakong ee a batla ho toboketsa ho Abrahamama boholo le matla a Hae? Molimo o ne a re'ng e tla hloka Abrahamama a tšepe boholong le matleng ao? Talima haholo-holo temana ea botšelela.**

---

---

Phetolelo e otlohileng ea Genese 17:1–6 e ne e tla ba, “Jehova a iponahatsa ho Abrame, eaba o re, ‘Ke 'na 'El-Shaddai; Tsamaea pel'a ka, 'me u be khabane; 'me ke tla tiisa selekane sa ka, se mahareng a ka le uena, ke u atise haholo-holo . . . 'me u tla ba ntat'a letšoele la lichaba, . . . Ke tla u atisetsa bana haholo-holo.’” lebitso le tšoanang le hlaha hape ho Genese 28:3, moo Isaaka a reng 'El-Shaddai o tla hlohonolofatsa Jacobo, o u atise, o u anafatse. Tšepiso e tšoanang ea 'El-Shaddai e fumanoa ho Genese 35:11, Genese 43:14, le Genese 49:25, litemana tse bontšang bongata boo Molimo o fanang ka bona: 'El, Molimo oa matla le borena, le Shaddai, Molimo oa maruo a sa feleng, maruo ao a ikemiseliseng ho a nea ba a batlang ka tumelo le ka kutlo.

**Puo e ee be hore thungthung ka lebitso le fe kapa le fe e tla 'ne e nkhe hamonate, e le taba ea hore lebitso ha le na taba. Feela, u ne u tla ba le boiketlo le tšepo e kae hoja lebitso la Morena e ne e le “Molimo o Tetemang” kapa “Molimo o Fokolang”? Talima litemana tsa kajeno. Sebakeng sa “Molimo o Matla 'Ohle” bea mabitso ana a mabeli. E ne e tla ama tumelo ea hau joang le tšepo ea hau ho Eena haeba Molimo o ne o ka iponahatsa ho rona ka sebopeho seo? Ka tsela e tšoanang, lebitso 'El-Shaddai le re fa boiketlo joang?**

## Abrame e ba Abrahamama (Gen. 17:4, 5)

Leha mabitso a Molimo a tla ka boleng ba semoea le borapeli, ha a felle feela ka Molimo. Mabitso a batho ba mehlang ea khale Bochabela bo Haufi e n'e se tsela e se nang le moelelo feela ea ho hloaea joalo ka ha ho le joalo ho rona hangata. Ho rea ngoanana Mary kapa Susy ha ho etse phapano e kaalo kajeno. Bakeng sa batho ba khale ba Bochabela, leha ho le joalo, mabitso a batho a ne a tla a jere boleng ba semoea. Mabitso a batho ba Bochabela kaofela ha oona a na le moelelo 'me a atisa ho boptjoa ka poleloana kapa polelo e khutšoanyane e neng e phuthetse takatso kapa boipolelo ba teboho ea motsoali. Mohlala, Daniele e bolela "Molimo ke moahloli"; Joele e bolela "Jehova ke Molimo"; kapa Nathane e bolela "Neo ea Molimo." Ka lebaka la bohlokoa bo qhoaelloang mabitsong, mabitso a ne a tla fetoloa ho bontša phetoho e felletseng ea bophelo le maemo a motho e mong.

**Sheba litemana tse latelang. Li sebetsana le maemo a fe, 'me ke hobaneng ha mabitso a ile a fetoloa maemong aa?**

### 1. Gen. 32:28

---

### 2. Gen. 41:45

---

### 3. Dan. 1:7

---

Ka ntsoe le le leng, leha ho le joalo, ha ho thata ha kaalo, le ho likelello tsa morao-rao, ho utloisisa bohlokoa ba seo motho a se bitsoang. Ho na le ho ama ho potelletseng, kapa ho sa potellang ka linako tse ling. Haeba motho e mong a lula a bitsoa "leoatla" kapa "bobe," 'me haeba ke mabitso ao a bitsoang ka oona nako eohle ke batho ba bangata—kapele kapa hamorao mabitso ao a ka ama tsela eo motho eo a italimang ka eona. Ka tsela e tšoanang, ka ho fa batho mabitso a itseng, kapa hona ho fetola mabitso a bona, ho bonahala ho khonahala hore ho ka susumetsa tsela eo ba italimang ka eona 'me kahoo ea susumetsa boitšoaro ba bona. Ka mohopo ona, ha ho thata ho utloisisa lebaka leo Molimo a fetolang lebitso la Abrame ho ba Abrahamama. Abrame e bolela "Ntate o phahamisitsoe"; Molimo o le fetoletse ho Abrahamama, e bolelang "Ntat'a matšoele." Ha u talima tšepiso ea selekane eo ho eona Molimo o reng, "'Ke tla u atisetsa bana haholo-holo, ke u etse lichaba, 'me marena a tsoe ho uena'" (Gen. 17:6), phetolo ea lebitso e fana ka moelelo o fetisang. Mohlomong e ne e le tsela ea Molimo ea ho thusa Abrahamama ho tšepa tšepiso ea selekane, e neng e etsetsoa monna ea lilemo li 99 ea nyetseng mosali-moholo eo esaleng a se na thari. Ka bokhutšoanyane, Molimo o e entse ho eketsa tumelo ea Abrahamama litšepisong tsa Molimo.

## Mekhahlelo ea Selekane (Gen. 12:1, 2)

Litemaneng tse peli tseo tsa pele mekhahlelo ea pele ea tšepiso ea selekane sa Molimo ho Abrame (ho teng e meraro) ea senoloa. Molimo o atamela Abrame, a mo fa taelo, eaba o mo etsetsa tšepiso. Katamelo ena e hlalosa khetho ea mohau ea Molimo ho Abrame hore e be motho oa pele oa mantlha oa selekane ea Hae se khethehileng sa mohau. Taelo e kenyelletsa teko ea tšepo e felletseng ho Molimo (Heb. 11:8). Tšepiso (Gen. 12:1–3, 7), leha e etselitsoe litloholo tsa Abrame ka ho khetholoha, e qetella e kenyelletsa tšepiso ho leloko lohle la botho (Gen. 12:3, Gal. 3:6–9).

**Mokhahlelo oa bobeli oa selekane sa Molimo le Abrame o hlaha Genese 15:7–18. Ke temaneng e fe moo re fumanang mehato e tšoanang le e hlahileng mokhahlelong oa pele?**

**Katamelo ea Molimo ho motho? Litemana?** \_\_\_\_\_

**Boipiletso ba kutlo ea motho? litemana?** \_\_\_\_\_

**Tšepiso e halalelang? Litemana?** \_\_\_\_\_

Tšebeletsong e mahlonoko ea mokhahlelo oa bobeli, Morena o iponahatsa ho Abrame 'me o feta mahareng a mekheketho e pakiloeng ka makhetho a liphoofole. Phoofole ka 'ngoe ea tse tharo e ne e hlabiloe ea aroloa likoto tse peli tse beiloeng karolo holim'a karolo, ho na le sebaka lipakeng. Linonyana li ne li bolauoe feela li sa khekethoa. Ba neng ba kena selekaneng ba ne ba lokela ho tsamaea mahareng a mekheketho ena, e le sesupo sa kutlo ea kamehla ho mpho tse lumellanoeng.

**Hlalosa se ileng sa etsahala mokhahlelong oa boraro le oa ho qetela oa ho etsa selekane se halalelang le Abrahamama. (Sheba Gen. 17:1–14.)**

Moelelo oa lebitso Abrahamama le supa takatso ea Molimo le morero oa hae oa ho pholosa batho bohle. "Lichaba tse ngata" li ne li tla kenyelletsa ka bobeli ba-Jude le Balichaba. Testamente e Ncha e hlakisa haholo hore litloholo tsa 'nete tsa Abrahamama ke ba nang le tumelo ea Abrahamama le ba tšepetseng makhabaneng a Mesia ea tšepisitsoeng. (Sheba Bagal. 3:7, 29.) ka mokhoa o joalo, ho tloha morao ho Abrahamama, morero oa Morena e ne e le ho pholosa batho ba bangata ka hohle kamoo a ka khonang, ho sa natse na ba phela lichabeng li feng. Ha ho potang, ha hoa fapana le kajeno.

**Bala Tšenolo 14:6, 7, molaetsa oa lenyeloi la pele. Ke lintho li fe tšoanang tseo u li fumanang mahareng a seo lenyeloi le se bolelang le se etsahetseng selekaneng le Abrahamama? Litaba tse li tšoana ka litsela li fe?**

## Maikarabello a Selekane

“Ke tsoe ke mo tseba hoba, o tla laela bana ba hae, le ntlo ea hae ka mor’a hae, hore ba boloke tsela ea Jehova, ba etse ka ho loka le ka tšoanelo, Jehova a be a hlalishetse Abrahamana seo a ‘maletseng sona’” (Gen. 18:19).

Joalo ka ha re bone ho fihlela mona, kamehla selekane ke selekane sa mohau, sa ha Molimo a re etsetsa seo re neng re ke ke ra tseba ho iketsetsa sona. Selekane le Abrahamana ha se mokhelo. Mohaung oa Hae, Molimo o ile a khetha Abrahamana e le sesebelisoa sa Hae ho thusa ho phatlalatsa leano la pholoho ho lefatše. Phethahatso ea Molimo ea litšepiso tsa selekane, leha ho le joalo, e ne e hokahane le boikemisetso ba Abrahamana ba ho etsa ka ho loka ho mo utloa ka tumelo. Kantle ho kutlo eo ea Abrahamana, Molimo o ne o se na ho mo sebelisa. Genese 18:19 e bontša kamoo mohau le molao li amanang. E qala ka mohau (“Kea mo tseba”) ‘me e lateloa ke taba ea hore Abrahamana ke motho ea ka utloang Morena, ‘me ea ka laelang lelapa la hae ho utloa, le bona. Tumelo le mesebetsi, li hlhella mona ka kopano e tiileng, joalo ka ha li tšoanela. (Sheba Jakobo 2:17.)

**Hlokomela, leha ho le joalo, mantsoe a sebelisitsoeng ho Genese 18:19, ka ho khetholoha poleloana ea ho qetela. E re’ng moo ka kutlo ea Abrahamana? Leha kutlo e se tsela eo ka eona u ka fumanang pholoho, e fuoa bohlokoa bo fe moo? Ho latela temana ena, na selekane se ka phethahatsoa ntle le eona? Hlalosa karabo ea hau.**

---



---

Litlhoholofatso tsa selekane li ne li se na ho fumanoa kapa li bolokoe ntle le hore lipehelo tse itseng li fihleloe ke baamoheli. Leha lipehelo li ne li sa hlokehe ho theha selekane, li ne li lokela ho ba karabelo ea lerato, tumelo, le kutlo. Li ne li lokela ho ba pontšo ea kamanano e teng mahareng a batho le Molimo. Kutlo e ne e le eona tsela eo ka eona a ka phethahatsang litšepiso tsa selekane sa Hae ho batho. Ho roba selekane, ka ho hloka kutlo, ke ho hloka botšephehi kamanong e thehiloeng. Ha selekane se robiloe, ho robhileng ha se pehelo ea phano empa ea phethahatso.

**Boiphihlelong ba hau le Morena, oa bona hore ke hobaneng ha kutlo e le bohlokoa haholo? Na u ka nahana ka mehlala, e ka tsoang Bibeleng kapa boiphihlelong ba hau, moo ho hloka kutlo e etsang hore tšepiso ea selekane e se phethahatsoe? Ha ho le joalo, e ne e le e fe, ‘me, hoa bohlokoa ka ho fetisa, pheko ke e fe?**

## Ho Ithuta Haholoanyane:

Bala Ellen G. White, “Pitso ea Abrahamama,” maq. 125–131, ho *Patriarchs and Prophets*; “Mo-Juda le Molichaba,” maq. 188–200, ho *The Acts of the Apostles*. Mookoli ke letšoao la selekane sa Molimo le Noe. Bala Genese 17:10 ho fumana hore na letšoao la selekane sa Molimo le Abrahamama e ne le le fe. Lebollo “le ne le reretsoe: (1) ho hloaea peo ea Abrahamama ho Balichaba (Baef. 2:11), (2) ho ntšetsa pele khopolo ea selekane sa Jehova (Gen. 17:11), (3) ho khotlaetsa bohloeki ba boitšoaro (Deut. 10:16), (4) ho tšoantša ho lokafatsoa ka tumelo (Baroma. 4:11), (5) ho tšoantša lebollo la pelo (Baroma 2:29), le (6) ho ba seriti sa kolobetso ea Bokreste (Bakol. 2:11, 12).” —*The SDA Bible Commentary*, pok. 1, maq. 322, 323. Mookoli o tla lula e le letšoao le tšepiso ea Molimo ho fihlela bofelong ba lefatše, empa ha ho na ba joalo ka letšoao le lebollo. Ho ea ka moapostola Pauluse, lebollo le amohetsoe ke Abrahamama e le sesupo sa ho lok aho a neng a ho amohetse ka tumelo ho Molimo (Baroma 4:11). Leha ho le joalo, ka mengoaha-kholo, lebollo le ile la qetella se le tšoantša pholoho ka poloko ea molao. Ka nako ea Testamente e Ncha, lebollo le ne le se le lahlehetsoe ke boleng. Ho na le hoo, taba ea bohlokooa ke tumelo ho Jesu Kreste, e tlišang bophelo bo nang le kutlo, bo fetohileng. Bala Bagalata 5:6; Bagalata 6:15; le 1 Bakorinthe 7:18, 19.

## Lipotso tsa Puisano:

1. Buisanang ka kamano e mahareng a tumelo le mesebetsi. Na e ‘ngoe e ka ba teng ntle ho e ‘ngoe? Ha ho se joalo, ke hobaneng?
2. “Ba bangata ba ntse ba lekoo joalo ka Abrahamama. Ha ba utloe lentsoe la Molimo le bua ka ho otloloha ho tsoa maholimong, empa o ba bitsa ka lithuto tsa Lentsoe la Hae le ka liketsahalo tsa molemo oa Hae. Ba ka hlokoa ho lesa mosebetsi o tšepisang leruo le hlomphe, ho lesa likamano tseo ba li ratang tse bileng li leng molemo, ‘me ba arohane le ba habo bona, hore ba kene tseleng e shebahalang e le ea boitatolo, maima, le sehlabelo feela. Molimo o na le mesebetsi bakeng sa bona, empa bophelo ba boiketlo le tšusumetso ea bakhotsi le ba habo bona e tla sitisa kholo ea libopeho tse bohlokooa bakeng sa katileho ea oona. O ba tlosa tšusumetso ea batho le thuso ea bona, a ba etse hore ba utloe bohloki ba thuso ea Hae, le ho itšetleha ka eena feela, e le hore a tle a iponahatse ho bona. Ke mang ea itokiselitseng hore ha a bitsoa ke Molimo a lahle maano a ratoang le setsoalle seo a se tloaetseng?” —Ellen G. White, *Patriarchs and Prophets*, maq. 126, 127. Buisanang ka mehlala e teng hona joale ea ba ileng ba latela pitso e joalo.

**Kakaretso:** Molimo o ile oa bitsetsa Abrahamama kamanong e khethehileng le Eena, e neng e tla senola leano la pholoho ho lefatše.